

Tiago

1 ¹Natyo Tiago Enore wakanehare, Xekohaseti Jesus Cristo wakanehare hoka naxikatya babera nokatyawaxi maheta tyotya Enore kaxaikone hotyalinae xaorekoitere waikohekoia hiye maheta.

Tyakekoti Waiyoliniti Xoaha

²Nohinaeharenæ, maika xihalahare xisaona tyotya xihasakaharetyaka kakoa xijiyehena hoka. ³Hiyaiya, xityakekoneya jiyahaotya exehare hasakaharetyati hoka exahexeya xikinatere xisaona. Exe harenæ waiyekehalakita xomana.

⁴Maika exe hasakaharetyati hiyeta xikinatere xisaonitere hiyeta waiye, tota maniya xisaona, iniyalahare ximaomanehare xisaona.

⁵Maika hatya maisa waiyorexe hoka axa Enore hoka awaiyolinikisene. Isaiya, hiyaiya, waiyexehare atyo hoka hawaiyexehare kakoa tyotya halitinae ana ijita. ⁶Xakore hoka xaxehena hoka xityakekone kakoa xaxa. Awa atyo ximatyakekone kakoa xaxa. Hiyaiya, xala xamani atyo matyakekoita hoka, “Xoana isa xamani, maisa xamani”, nita hoka one kaloxere hoholati takoiyaxaitere hamaniyaxa, hamaniyaxa akereta atyo tyaonita. ⁷Xala xamani atyo nikarexe hoka maisaiya xoare Enore ijita enomana. ⁸Hinama maniya haxowakita ahekotya hoka maisaiya xoana xowaka waiyoreta háomane kakoa.

Maxiyehaliti, Xiyehaliti Xoaha

⁹Maika hatya tyakekohatiye maoloxahare kaxiyeharehena hoka ihalahare Enore kakoa, kaxiyeharetene hoka. ¹⁰Maika nikareta tehitija kaxiyeharexe maxiyeharehena hoka ihalahare Enore kakoa, maxiyeharetene xakore hoka. Hiyaiya, kaxiyeharexe ite maiyare iyiti masekoia tyaonitere akereta. ¹¹Kamae watehena hoka enowatya keraita hananehaliti, hoka iniye exoita, enowaiyehare emaisatita. Nikare tehitija ite kaxiyeharexe kamawenekoaretyaka haxiyeharenæ nonitata.

Xamaikoharetyati Hasakaharetyati Xoaha

¹²Waiye kaiserehare atyo xala xamani xakore kahasakaharetyaka hoka heko tyaonitere. Hiyaiya, jiayahao akatya najikini atyo ite wenati waiyexe kaxekaka enomana, Enore haxawaiyeranae ana isa aokowihenere.

¹³Xala xamani kahasakaharetyakehena examaikoharene xowaka hoka awa atyo nexa: “Exe hasakaharetyati atyo Enore nalitare”. Hiyaiya, Enore atyo maisa hasakaharetyare iniyalahare kaomaka maheta. Maisa atyo xala hare hasakaharetyare. ¹⁴Exakere hatya kahasakaharetyakita: Kamaoseratyakita hoka exahekola iniyalahare kaxawaiyetyakitere hiyeta atyo kahasakaharetyakita. ¹⁵Hoka hatyo xahekore ewaxirahare hiyeta atyo iniyalahare kaotyakita. Hoka iniyalahareya wahehena tyaonita hoka kamati kaotyakita.

¹⁶Awa atyo xamaoseratyoawi, noxiyakawali nohinaeharenae.

¹⁷Tyotya waiyexe kaxekakitere harenae womana atyo enokoatare.

Tyotya hatyoharenae atyo Enore nalitare. Enokoare xaokanatyakalati nomasehare nalitare. Maisa ini hekoti haxahekola hawarehare mokare.

¹⁸Exahekola xema atyo wikaotyaka, iraiti aliterexe hiyeta. Tyotya xoalini hare tyomehenere konita wiso hotohare hetati wisaona maheta.

Semati, Omati Xoaha

(Atos 10.35; Tito 3.1-2; Tiago 3.17-18; 1 Pedro 4.7-11)

¹⁹Exeharenae xotya, noxiyakawali, nohinaeharenae. Maika ximemere xisemaxemala kakoa xisaona. Waiye xahekotya hotohare hoka xirae, xehare harenae. ²⁰Hiyaiya, haliti xeharene maisa Enore aokiterekare ekaotyakatyare. ²¹Hiyeta hoka xahalakisa ewaxirahare xománe, xiyearene harenae hoka xawaiyexeharene kakoa Enore niraene xaoka xomana hoka waiyexe maniya moheta xiso.

²²Awa atyo xamaoseratyoawi. Awa atyo exe iraiti xasema taita. Xasemene hoka aokiterekera akereta xisaona. ²³Hiyaiya, xala xamani atyo sema taita iraiti hoka maisa aokiterekera akereta tyaonita hoka hatyo atyo hatya haliti tiho waiyakakalati waiyoawi hoka aliyakere haliyere xamani akereta.

²⁴Waiyoawi hoka xaneheta hoka hixerore haháre maotyanihitita akere.

²⁵Hiyaiya, Enore xaotyakira atyo waiye maniya mokita wenati. Xala xamani atyo heko Enore xaotyakira akereta tyaona, maisa semitene taita hoka, xoare xamani tyomehena hoka Enore ehateni awaiyetya.

²⁶Hoka xala xamaniya atyo tyakekohatiye xakore aokowita hoka iniyalahare iraeta hoka maisa atyo tyakekotere xoare tyomare. Maoseratyoawita atyo.

²⁷Wexe Enore ana atyo wenati aliterexe exe: tyajikihalo, tyajikihare, maiyanenehalonae kahinaetyaka examaikohareneha hiyeta. Kaxaikoawiti hoka maisa matyakekoneharenae nawenane akereta nawenatyakere.

Hakakoa Xomokakakoati

2 ¹Nohinaeharenae, xityakekohenerenae Wiyekohase kinaterexe Jesus Cristo: Awa atyo haiyanae xikirawane, haiyanae waiye xamoka xoaha, ehárenaeha waiyakene hiyeta. ²Xiyaiyehenaira ite: ouro hoko kahitiniye, waiyexe imiti ako ijoitere xamaniyatya isoa xomana xihohisakoitere nali hoka

hatya tehitiya maoloxahare isoа, imiti exololo nimere. ³Hoka waiyexe imiti ako ijoitereya waiye xamoka hoka xexa ihiye: “Exaose atyo waiye, exaose hisoka”, hoka maoloxahare hiyea xexa: “Hativitya nali, maisa hoka hisoka waikoa nokiji haliyi”. ⁴Exakere atyo, hatya waiye xamokita, hatya maisa waiye xamokare xoaha hoka iniyalahare atyo xamokakakoita. Maisa waiye xahekotyare.

⁵Xasemehena, nohinaeharenae, noxiyakawalinae: Maxiyehareharenae atyo Enore aoka haomana ali waikohekoare hoka kaxiyeharexе tyaponaha maheta hatyakekoneha hiyeta enokoa nali. Enore haxawaiyeraharenae anere aohenere enomanereha tyona maheta. ⁶Xakore hoka maxiyehareharenae xikirawaneta. Maisa kore kaoloxerenae xini kolatya xiso xekohasetinae nahalakoa hoka iraeharetya xiso hoka iniyalahare xikaxomokakere? ⁷Xoana maisa hatyonae xini iniyalahare iraeta waiyexe Enore kaxakaisakitere xihiye xaokaka?

⁸Enore xaotyakirahooya xityakeko hoka waiyexeya xisoma aokitere akereta. Hiyaiya, exakere Iraiti Waiyexe nanekoa kaxairatyaka: “Hawaiyetya haiyanae hawaiyetyoawitere akereta”. ⁹Hoka halitinaiya eháre waiyakeneha waiyakahare waiye xamokita hoka iniyalahare atyo xisomita. Xaotyakisatyaho hiyeta iniyalahare nomashare xikaxaokaka.

¹⁰Hiyaiya, hatyaiya htahi xaotyakiye aokitere akereta maisa tyaponita hoka tyotya xaotyakisatyaho aokiterenae atyo maisa aiminijita.

¹¹Hiyaiya, hatyo xaotyakisatyahota exakere nexa:

“Awa atyo hatya nohiroxa hiwatyal”.

Exahe nexatehitiya:

“Awa atyo haisa”.

Exahiya maisa hatya nohiroxa hiwatyalita hoka haisaiya hoka iniyalahare atyo hisomita.

¹²Maika xaotyakisatyaho aokitere akereta xirai, xisoma xoaha hoka maisa xoana xikaxomokakita. Hatyohare atyo mehexaikohaliti ijita womana. ¹³Enore axehenere haliti akahenere xowaka ite maisa airakoaneharetitia haiyanae maxairakoanehareraharenae. Xakore hoka haiyanae airakoaneharehenerenae atyo ite maisa iniyalahare kaxomokakita, xaxalisati ferakene.

Tyakekoti, Omati Xoaha

¹⁴Nohinaeharenae, xoare mahetaiya hatya tyakekota xakore aokowita hoka maisa hatyakekone akereta tyaonare hoka? Xoana hatyo ityakekoneyaka waiyexe maniya mohetene?

¹⁵Hiyaiya, wihinaehalonae, wihinaeharenaeaya maimahare, manakairahare hoka ¹⁶maisaiya xoare xisare enomanaha hoka xoare mahetaiya, “Maika Enore waiye moka xiso, waiye xisoa ximako, xikanakaira harenae”, xexa? ¹⁷Hiyeta hoka tyakekoti atyo exakere: Maisaiya xoare waiyexe kaomakere tyakekoti hiyeta hoka maisa tyakekore, ekamane akere atyo ityakekone tyaonita.

¹⁸Hatyat ite nehena: “Hiso atyo hityakekota, hoka natyo atyo waiyexe notyomita. Hahotikisa nomani hityakekone xoalini hare waiyexe

himaomanehareta hoka natyo ite nahotikisa notyakekoni homana waiyexe nománi hiyeta”.

¹⁹Homana atyo Enore haterore. Ehekore! Tihanarenae tehitiya tyakeko hoka mairaha hoka tatakoaha hamairaneha. ²⁰Maotikoniti! Nahotikisa ite homana. Tyakekoti waiyexe maomakahare atyo maisa xoare tyomare.

²¹Xoaneretya hoka wahetakomaniyere Abraão Enore tyakeko? Enawenane hiyeta awaiyetene, haisani Isaque aisa hoka fetaty aokowihenre hiyeta. ²²Ityakekone, enómane waiyexe harenae hiyeta atyo kawaiyaka. Ityakekone hatyo waiyexe tyomehenere hiyeta masakare waiye tyaona. ²³Exakere kaotyaka Iraiti Waiyexe nanekoa aokitere akereta: “Abraão Enore tyakeko, hoka ityakekone hiyeta waiyexe haliti aokene”. “Nohinae Abraão”, nexa Enore exaokaka.

²⁴Enore atyo haliti tyakekota, waiyexe tyomehena hoka. Maisa ityakekone hiyeta taita xini. Exeharenae hiyeta ite waiyekehalakehena xomana.

²⁵Xiyaiyehena Raabe enatyalolo nawenane. Israel hotyali kaoka enomana hoka waiye mokahene hoka hotikisa haho ahoti enomanaha hoka waiye xanehenahitaha. Hatyo enómane hiyeta Enore tyakekone.

²⁶Hiyaiya, nikare tehitiya haréti maisekoharehare hoka ekamane tyaonita. Nikare tehitiya tyakekoti: waiyexe maomakahare hoka ekamane akere tyaonita.

Niniseti

3 ¹Nohinaeharenae, haiyanæ taita ite xinekonitare tyakekohatiyenæ xaotyakisase tyaona. Hiyaiya, wiso waotyakijiterenæ xiso ite masakare wikaxaxalisakehena haiyanæ xahexe. Hatyo harenæ waiyekehalakita xomana.

²Wityotya maisa ehekore wisaonare kahareki. Hoka hatyaiya waiyexe taita iraeta hoka hatyo atyo waiye kaiserehare, waiye atyo haháre kaxaikota.

³Kawalonæ kanasako examemakisakala wamoka hoka waokitire akereta tyaona maheta, aliye maniya xamani xane waokita hoka waokitire akereta waxanikisahitene.

⁴Xahekotya kanowa kalorexe tahi: Kalore xakore hoka hoholati kinaterexe hoholasekoaitene. Kirane xakore kanowa xaetonakisakala hoka alyako xamani exaetonakisase xane aohena hoka hatyo maniya xaneta. ⁵Nikare atyo niniseti tyaonita. Kirane xakore hoka kahareya kaxaokowiharetyoaka hoka maisaiya haiyanæ hiye waiyeta.

Xiyaiya, nikaretaiya inirere irikati hiyetaiya kalore xakore koloho hoka kalore kera. ⁶Niniseti atyo irikati akereta. Ewaxirahare kakoare atyo hoka haréti tyotya ahowetitita, komaniyatita wiso. Irikati toloko tare keritere akereta niniseti aiyalaharetita wawenane, wawenane atyo irikati maniya mokita.

⁷Halitiya waiyehena jiyahaotya kirakaharenæ. Koxaka jiyahaotya kirakahare xalijinharexenai, kotehalanai, kirakahare nolokehetyoiterekarenai, kohase xoaha. ⁸Xakore hoka maisa atyo xala hare niniseti jiyahaotyre. Maisa waiyexe, howero katawanexe kakoare atyo, maisa atyo xalahare jiyahaotyarene.

Enore Maxawaiyerene
(1 Corint. 10.6-10; 1 Tim. 1.9-10)

⁹Exahe wininise kakoa Wexe Enore kakoa wihalahareta. Halitinae hoka wikirawaneta. Enore haháre akere hare tyomehenere. ¹⁰Hatyó kanase kakoita kaihalaharetyakita Enore kakoa, haiyanæ kairawaiyakita. Nohinaeharenæ, maisa atyo nikare nawenatyaka waiyexe.

¹¹Hatyoahota makereyaka one tihexere, wiyxere xoaha hikoahena? ¹²Nohinaeharenæ, xoana halohalo kateyaka azeitonali kali? Xoana uva kate xamaniyaka halohalose kase? Nikare tehitiyaiya onehiyase kexaxere maisa aliyakere wiyxere tyaanita.

Aliterexe Irihaliniti

¹³Xoana hatya otyahati, waiyorehati xinekoni? Maika maxahenerahareneta hotikihena hawaiyorene, hawenane waiyexe harenæ.

¹⁴Xakore hoka xokoawaharehati, xeharehati, ximaxihatya xisaonita hoka awa atyo xaokowiharetyoa xawaiyorene kakoa hoka xamaoseraty.

¹⁵Exeharenæ waiyoliniti atyo maisa enokoatare xini. Waikohekoatare atyo, kirakahare, tihanaretare atyo. ¹⁶Hiyaiya, alyako xamani atyo okoawahaliti, xaokowiharetyoati tyaanita hoka nali tehitiya atyo mawaiyekhalakiti, xoalini hare iniyalahare kahare tyaanita.

Wenati Waiyexe

(Romanos 12.9-21; Tito 3.1-2; Tiago 1.19-22; 1 Pedro 4.7-11)

¹⁷Enokoatare waiyoliniti tyoitere atyo waiyexe taita ewaxiraharenæ nomitata: mehexaikohaliti, waiyexehaliti, waiye haliti xomokaka harenæ. Xairakoanehaliti kakoare hoka waiyexe tyoma kahare, maisa ahinityare, maoseratyare xini.

¹⁸Hiyaiya, waiyexe atyo kaotyakita waiyexe mehexaikohaliti tahi xakaiterenæ xakaini hiyeta.

Matyakekoneharenæ Kakoa Kahinaeharetyoaka

4 ¹Alyakota mokotyakakoati, xiholakakoati kaotyakita xinekoni? Iniyalahare waha aka xahekoitere hiyeta. ²Kahare xakore xoalini hare xaokita xomana hoka maisaiya aliyakere tyotya xomanere tyaanita hoka kasani xaisa akaty hoka xiyahene xaokowita. Xaokita xakore xomana xoalini hare hoka maisa xaokitere akereta tyotya xomanere tyaanare hoka hatyo hiyeta xaisa kakoa, xiyalijinita. Maisa xomanere tyaanareha, maisa Enore xaxare hoka. ³Xaxa xakore Enore hoka maisa isare xomana, iniyalahare xiyahekola kakoa xaxita hoka. Xoalini hare xaokita xikehalaharene niyahare taita xaokitene hoka maisa Enore isare xomana.

⁴Maisa Enore aokitere akereta xisaonita! Iniyalahare nomaseharenæ hinaeharenæ kaiserehareya xisaona hoka xikalalakoahareya Enore kakoa. Xoana, maisa hatyohare waiyekhalakita xomana? Hiyaiya, xala

xamani atyo iniyalahare nomaseharenae hinaehare aokowi hoka Enore nahalakoahare atyo tyaona.

⁵Awa atyo motya enenaharenae Iraiti Waiyexe nanekoa iraeta xaoka:
“Isekohaliti mohenere wihiye kalore iniyalahare taita ahekotita”.

Maika Ximaxahenerahare Xisaona
(Filip. 2.3-9; 1 Pedro 5.5-7)

⁶Xakore hoka Enore kahinaera atyo masakare kinatere. Hiyaiya, exakere Iraiti Waiyexe nanekoa nexa:

Enore atyo maisa awaiyetyare ahinityaliyenae hoka
maxaheneraharenae atyo kahinaetita.

⁷Hiyeta hoka Enore xityakeko. Xaiyateretyoa Tihanare xahita hoka tekoa xonita. ⁸Xaiyateretyoa hoka Enore maniya taita xisaona hoka kaxaiko ite xiso. Xatihehetra xikahe, iniyalahare nomaseharenae. Iniyalahare xahekoitere xahalakisa, awa atyo hinama maniya haxowakita xahekotya.

⁹Xamaikoharehena, ximawaiyeharehena xawenane hiyeta. Xakawihena, xitiyahena harenae. Xikoexane nonitata xitiyahena, xihalaharene nonitata xamaikoharehena. ¹⁰Maika ximaxahenerahare xisaona Xekohaseti haoti hoka kalorexe moka xiso.

Iraeharetyati

¹¹Nohinaeharenae, awa atyo xiraeharetya kakoa. Xala xamani atyo hahinaehare xaokaka iniyalahare iraeta, iraeharetita, hoka xaotyakisatyaho xaokaka atyo iniyalahare iraeta, kirawaneta. Xaotyakisatyaho xahehare aokowita. Xaotyakisatyaho xaokakaiya atyo iniyalahare hirae hoka xaotyakisatyaho xahehare atyo haokowita, maisa atyo xaotyakisatyaho xema xini hisaonita. ¹²Enore taita xaotyakisayahonae tyomita, hatyo taitaiya atyo xaotyakisatyaho xahehare. Waiyexe maniya xamani moka akatya, xoana mawenekoare akatya xamani. Hoka xala atyo haokowita hoka hihinaehare Cristo koamaniya tyaconitere hiraeharetita?

Xahekore Makani Niyahare

¹³Xasemehena kalikini xiso xiterenae: “Kalini xamani, makani xamani ite hakoa wenakalati wiyanehena hoka nali ite haterehokoane wisaona hoka xoalini hare wahaka hoka kalore wikaoloxa”. ¹⁴Xoana hoka nikare xiraeta? Hiyaiya, maisa atyo makaniye xawenane kakoa xawaiyorexe. Morexalo kaotyaka hoka maiyarehititere akereta atyo xawenane. ¹⁵Exakere xiraeta hoka ehekore: “Enore xaokalitaiya hoka waokitere xoalini hare wisoma”.

¹⁶Xakore hoka xahinityali xaokowiharetyoali taita. Hatyo atyo maisa waiyexe. ¹⁷Hiyeta hoka xala xamani atyo waiyore, waiyexe tyomita hoka maisa tyomare hoka iniyalahare atyo tyomita.

Kaxiyeharexenae Xakaisaka
(1 Tim. 6.9-10)

5 ¹Xasemehena, xiso kaoloxerenae! Xakawihena, xitiyahena xaheta maniya iniyalahare xiymokaka kakoa. ²Xixiyeharenae mololota, ximanae waiyexenae kirakaharesenae sesekasekoita. ³Xixiyehare ouro prata harenae kajikali tyaonita. Hatyo harenae ite halitinae waiya hoka xawaiyekahalakaharehena enomanaha. Hoka motya ite irikati keraita ene xiháre akereta tyaona. Exahe kafaka maniyehena enoheno xamokita xoloxa xixiyeharenae harenae.

⁴Exahe maisa xabakaita halitinae imexehenere ximasenekoata. Hoka xasemehena enosexehareha! Enosexahareha xane kaoka Enore maxaexahityakahare niyaterexe nali. ⁵Ali atyo kalini kehala xisaonita, xoalini hare xisoma xaokowihena, exahe maisa xoare niyahare hoka xisomita. Xikolotya, waiye xisaonita, motya bowi okoi xaisakalati nali kakolatyaka hoka kaxaisakitere akere xisaonita. ⁶Iniyalahare maomaneharenae xaisaka xaokita, xajita. Hoka hatyoha atyo maisa xoare hare tyomare xikakoa.

Heko Xatyahati, Iraexatyati Xoaha

⁷Hiyeta hoka maika ximaholawakahareneta xatyaha Xekohaseti haikoahaneheta kijiya, nohinaeharenae. Hiyaiya, masene waikate fehena masene hoka hatyo najikinita atyahita waha, maisa kaholawakere ekakoa. Wahehena hoka enakaira ihatita. Mokosetatere xowaka oneta ihiye, inityokatehena hoka onehitita kaiserehareta ihiye hoka. ⁸Hoka xiso tehitiya ite nikareta xatyahahena ximaholawakahareneta. Awa atyo xamaikohare. Hiyaiya, Xekohaseti ite haxeroreta haikoaheta.

⁹Nohinaeharenae, awa atyo xiraeharetyakakoa, waiya aliya hoka hatyo nahalakoa iniyalahare xiymokaka aoka Enore. Hiyaiya, haliti watyalisasehare atyo okihetehena.

¹⁰Xotyaxematyá toahiyereharenae iraiti xakaisaseharenae. Enore xaokalita iraeta hoka makawatiharahitaha waha aka hoka heko tyaonahitere. Enawenaneha akereta xisaona. ¹¹Hiyaiya, nikare makawatihareterenae heko tyaoniterenae xaokaka, “Kaxiyani, waiye kaiserehare”, wita.

Kala koxaka xasema Jó tahi. Heko aiyasetyoa hawenane Enore koamaniya kakoa hoka wahehena hoka Enore waiyexe wenati aoka enomana. Hiyaiya, Enore atyo kalore xawaiyetyati, xairakoanaharetyati kakoare.

¹²Hoka exe kaiserehare, nohinaeharenae: xoalini hare xiraehena halitinae hiye hoka, “Exakere ite notyoma”, xehena hoka awa atyo Xekohaseti nexare xakaixaretya, exahe waikohekao xoalini hare xakaixaretya xiraine katyakekotyaka maheta. Xexa taita, “Há”, xexa aliterexehena hoka, “Maisaiya”, maisa aliterexehena hoka maisa Enore iniyalahare mokita xiso maheta.

¹³Xala xamani xinekoni tyaonitere kirakoane tyaonita hoka iraexatya.
Xala xamani ihalahareta hoka xera xerati haihalaharene kakoa.

¹⁴Xala xamani hokakita hoka xakawisa tyakekohatiyena nityohalitiranae
hoka kolotenitiya iseri heno mokaha hoka iraexatya Enore hiye. ¹⁵Exe
iraexatyi tyakekoti kakoa nomakere atyo aiyatelikiheta hokakiti. Enore ite isa
enomana iyateliti hoka kinatereheta. Maotyaneheta ite iniyalahare tyomehenere.

¹⁶Hiyeta hoka xityakeko kakoa, iniyalahare xisomitere xiyakai kakoa
hoka xihinaeharenae xaokaka xiraexatya kaxaiyatelikisakeheta maheta.
Haliti waiyexe niraexala atyo masakare kinatere.

¹⁷Hiyaiya, iraiti xakaisasehare Elias wiso akereta hoka masakare hatyakekone
kakoa iraexatya hoka hanama terehokoane mokotexe maisa waikoheko oneta.

¹⁸Hatyaoleta iraexahitiya haki hoka one. Hoka enakaira tyaohtiya enomanaha.

¹⁹Nohinaeharenae, hatyaiya xinekonitare matyakekoneheta hoka
hatyaiya atyakekonikihiyene hoka maika exeharenae xotyaxemata:

²⁰Xala xamaniya atyo waiya iniyalahare nomasehare hoka iniyalahare
enómane nonitata waiyexe maniya mohetene hoka ekamane nonitata
iyehetene. Nikare ite hoka kahare iniyalahare kamaotyanityakeheta.